

四庫全書

史部

欽定四庫全書

史部

山西通志卷二十八

詳校官監察御史臣查善長

檢討臣德生覆勘

總校官進士臣朱鈺

校對官編修臣勵守謙

謄錄監生臣沈立銘

欽定四庫全書

山西通志卷二十八

山川十二

絳州

鼓山即鼓堆也在州西北二十五里接九原西坡周四里高五丈穹窿而圓形如覆釜人馬踐履有聲四周胥石磴下有泉又有清濁二泉出鼓山左繇九原山西坡少南石穴下分出二派入蓮池西合鼓水溉諸

村田

姑射山在州西北四十里

峩嵎山在州南二十里隸州境四十里迤邐夏間喜猗
氏臨晉滎河諸縣西抵黃河東臨曲沃坡南隸聞喜
馬首山土人名馬頭山在州西北四十里亘數百里東
繇太平界入絳西至稷山界出絳凡三十五里山繇
臨汾襄陵太平迤邐入州境一峰突出山上山後胥
鄉寧地山面東南與姑射隔一峪史記趙盾田於首

山即此一名火燄山上有火燄池水最清冽山險難
陟又名悔來山

玉壁山在城西北隅高二十丈有奇盤踞三里所謂玉
壁秋風也

冰壑在州北四里 李毓秀党冰壑狀北平里北窰莊
距州治四里許西枕土阜稍南兩崖對峙一流通中
而東注洞壑幽邃前州大夫之凌陰在焉先生暇則
徜徉其間寒潔素守視世俗薰灼泊如也因自號曰

水壑居士

九原山在州北二十里隸州境東西九里山面南平原突起土阜九區上有百神廟山產莞花 檀弓趙文子與叔譽觀於九原文子曰死者如可作也吾誰與歸叔譽曰其陽處父乎文子曰行并植於晉國不沒其身其智不足稱也其舅犯乎文子曰見利不顧其君其仁不足稱也我則隨武子乎利其君不忘其身謀其身不遺其友晉人謂文子知人

定境山金志有定境山汾水澮水鼓水

陽石山開山圖陽石山在絳北

汾河在南門外繇太平東南吳村流入州境經南關西
流入稷山境隸州境凡七十里 水經注汾水又西

逕魏正平郡南故東雍州治太和中皇都徙洛罷州
立郡矣又西逕王橋澮水入焉 水經又過長修縣

南 水經注汾水又西與古水合又西南逕長修縣
故城南漢高帝十一年以為侯國封莊恬也有修水

出縣南而西南流入汾汾水又西逕清原城北故清陽亭也城北有清原晉侯蒐清原作三軍處也

澮水在州南五里源出翼城縣澮高山西南過絳縣合絳水西過虎祁宮又西南至州境二十里經州西南橫橋莊入汾水經又西至王橋注於汾水水經注晉智伯瑤攻趙襄子襄子奔保晉陽原過後至遇三人於此澤自帶以下不見持竹二節與原過曰為我遺母卹原過受之於是澤所謂王澤也通考

正平有汾水澮水龍谷水晉虎祁宮

鼓堆清濁二泉合流成溝隋正平令梁軌曰水動物也
順之則下激之則上乃因地宜以激水迄今遵之

源出九原山一曰清泉一曰灰泉土人名神泓以滙
孚惠聖母祠南也 水經注古水出臨汾故城西黃
阜下其大若輪西南流故橫溝出焉東注於汾今無

水又西南逕魏正平郡北又西逕荀城東古荀國也
汲郡古文晉武公滅荀以賜大夫原氏也古水又西

南入於汾 樊宗師絳守居園池記水本於正平軌

病水滷生物瘠引古沃澦人便

古水樊記所謂古沃也當屬鼓堆泉泉掌

鎮大泉近鼓堆其大若輪或指泉掌

孫冲絳守居園池記序如曰水本

於正平軌正平帶郭縣也隋開皇十三年內軍將軍

為臨汾令臨汾即正平也十八年改正平焉軌字世

暮材令也惠州民井滷生物瘠疲因鑿山原自北三

十里引古水圖經云鼓堆地缺絕經濠坎則續之

以槽穿城牖入衙注池別分走街衙阡陌汨汨然鳴

激溝渠又灌溉畦町訖入於汾河頃縣前有梁軌遺
記熟見其蹟則知水本於正平軌由此而發語也

喬守記泉發於九原山之西鼓堆者或曰其北突有
二山高圓如鼓則泉以形似而名志曰泉上有堆如
覆釜形履之聲如鼓則泉以聲似而名泉有清濁二
穴清在北濁在南北穴為石口尺五許自滙而為池
幅幘一丈其深稱是池溢而南折而東流南穴為土
口尺許亦滙池溢而北折而東合於清流泉之西則

隆然高原南北疇皆資泉而溉其東至於絳州五十里而南竝入於汾

澤掌在州西北二里有眠窩泉瀉泉永和泉東北一里有龍頭泉合流

蘭村在州西北山半泉水無聲卯午酉湧出有聲土人名溢水

赤龍潭在大街北俗名泉兒墩

龍谷泉在州東北十八里龍香村左傳龍見於絳郊即

此

馬首山峪中水 繇稷山三界莊而下分二渠

泉掌鎮關王廟前大泉分二支至鎮南鎮西 鎮東有
溝溝左一泉名大渠溝右一泉名水渠又有活潑泉
春口泉王馬庫泉蛇泉

薛郭泉在古交

丁村泉在丁村

龍頭泉在龍頭村

修水 古水合汾汾水又西南逕長修縣故城南有修水出縣南西南流入汾

乾棗澗土人名扶蘇水後澗

天井水後澗

聞喜縣

中條山在縣南六十里西界夏縣東界垣曲在邑境者廣袤胥四十餘里山麓有郭堂巖

湯寨山在縣南八十里夏縣鳳凰山東乃中條分支也

寨為中條極險峭壁數千仞上有湯廟湫池禱雨多
應土人名湯王山又名景山下有郭璞書堂古產銅
隋地理志聞喜縣有景山蓋與三峻胥中條支山
水經注涑水與景水合出景山北谷 山海經景
山南望鹽販之澤北望少澤其草多藹萁秦椒其陰
多赭其陽多玉郭景純曰鹽販之澤即夏縣鹽池也
按經不言有水今有水
焉西北流注於涑水也 五朝志聞喜有景山有董澤

陂 舊志景山即湯山

鷲姑峯在湯寨西峯上有鎮風塔鷲姑廟

秦王嶺在湯寨東相傳秦王屯兵地

呂巖在縣東二十里呂莊

紫屏山在縣東四十里姚村後山列如屏其色紫土人
名六老峰

焦山在縣東五十里詳三峻

三峻山上林賦凌三峻之危郭璞三蒼注三峻山在聞
喜今縣東五十里有焦山高埒湯寨疑即三峻

鳳凰原在縣東六十里乃裴氏墓域也

雞鳴山裴氏譜鳳凰原墓西至雞鳴山裴氏宰輔十有
七人入省者六十一人官至三品者二十四人封國
公者十七人封郡縣公者四十人侯二人伯二人子
四人男四人駙馬五人皇后二王妃二

紫金山在縣東七十里盤盤山東二十里接曲沃界山
西名為鳳凰原

香山在縣東南三里巔有裴晉公祠前有三塔又前丘

村嶺有塔

官莊嶺在縣東南五里上有香山寺

橫嶺在縣東南九十里接垣曲界山脊橫亘下有三泉
出白石罅土人名白石河

鐵牛谷在縣南三十里相傳鐵牛流峪中水峪有興國
寺

瑤光峯在縣南四十里上有塔高埧夏縣瑤臺

盤盤山在縣南五十里秦王嶺東盤旋而上

觀音山在縣南九十里劉莊隘一峯突出下織上鉅玲
瓏差類落伽

栢林山在縣西三十里栢林村後石巖蒼翠下為壘水
崖再入為藁峪蓮葦清幽

峩嶺嶺在縣北三里由鳳凰原東而北迤邐漸高行二
十餘里四圍邱隴中為平原所謂晉原也晉城在焉
又北數里下瞰絳州其廣五十餘里

天皇頂在縣北十五里繇五龍廟一綫度峽突起園巔

高出羣巒之表

清原在縣北二十里左傳晉蒐於清原杜注在聞喜北
又馬融廣成頌采清原注在河東聞喜縣今日晉原
北臨絳西接稷山南俯聞喜廣袤數十里

稷王山在縣北五十里接稷山界后稷陵廟稷山主之
姜嫄陵廟聞喜主之左傳晉侯治兵於稷杜預註在
今聞喜縣

龍頭堡在縣東北五十里山勢似龍頭後周明帝嘗移

絳州治此

仙人洞在界原白石村大堰壑相傳郭璞讀書蹟

九龍山 金志有九龍山湯山涑水

涑水源出絳縣大陰山陳村峪伏流至柳莊復出合洮
水景水沙渠水西流縣境會溫泉水呂莊河甘泉水
過東橋經城南門外折而南又折而西過西橋入夏
縣界 絳水可以灌安邑當謂涑水以源於絳古亦
稱絳水也 水經涑水又西過周陽邑南 水經注

其城南臨涑水北倚山原竹書紀年晉獻公二十五年正月狄人伐晉周有白兔舞於市即是邑也漢景帝以封田勝為侯國也涑水西逕董澤陂南又與景水合水經又西南過聞喜縣南水經注涑水又西逕仲邨鄆北又西過桐鄉城北竹書紀年翼侯伐曲沃大捷武公請成於翼至桐庭乃返者也涑水又西與沙渠白水合西南逕左邑縣故城南故曲沃也晉武公自晉陽徙此秦改為左邑縣詩所謂從子

于鵠者也 春秋傳下國有宗廟謂之國在絳曰下國矣即新城也王莽之洮亭也涑水自城西注水流急濬輕津無緩故詩人以為激揚之水不能流移東薪耳水側即狐突遇申生處也

董洎在縣東四十里舜時董父豢龍之所一名豢龍池周數百步蒔荷滋稻浸溉十餘里 水經注涑水西逕董澤陂南即古池東西四里南北三里春秋文公六年蒐於董澤即斯澤也 左傳廚子曰董澤之蒲

可勝既乎 劉昭註聞喜有董池陂古董澤左傳曰

改蒐於董澤 路史董姓伯聞喜東有董池陂董澤

陂也 竹書紀年晉武公元年尚一軍為人乘京荀

人董伯皆叛者非秦川董 裴晉公湖園趙忠簡公

董澤書院皆在洎左明一統志宋相趙鼎先世家於

此

玉蓮泉在縣東二十五里川口南澗舊有蓮池上為白

蓮寺

甘泉在縣東三十里東鎮北黑龍溝水甘南流入涑隋
移縣治於甘谷疑即此上為黑龍廟禱雨多應

溫泉二一在縣東四十里官莊村一在南湖村二水相
鄰胥冬溫即泊泉也流入涑水

乾河在縣東四十里 史記伐韓到乾河山海經水冬
乾而夏流實惟乾河郭璞注河東聞喜縣東北有乾
河口因名乾河里今有溝無水

冷泉在縣東四十五里胡村西夏冷

黃蘆泉在縣東五十里黃蘆莊南流入汾水地有黃蘆
洮水在縣東六十里左傳子產對晉叔向曰臺駘能業
其官宣汾洮後漢書郡國志聞喜邑有洮水水
經注水源東出青新山世以為青襄山也又曰涑水
至周陽侯城與洮水合司馬彪曰洮水出聞喜縣
故王莽以縣為洮亭也然則涑水殆亦洮水之兼稱
乎按自橫水來者涑水自唐里來者洮水匯而為一爰名涑洮

暖泉在縣東南三十里王村冬暖

沙渠水在縣東南五十里白石村西北流會南山諸水
至呂莊入涑水土人名呂莊河水經注涑水又西
與沙渠水合水出東南近川西北流注於涑水 唐
志東南三十五里有沙渠儀鳳二年詔引中條山水
於南城下西流經十六里溉涑陰田

勝水溝在縣南四十里栢樊底水出崖間附草而下滴
澗如百鈴聲沿溪上陟即郭璞澗

秦王澗在縣南四十里美陽川相傳秦王三跳地

馬跑泉在縣南美陽鄉相傳秦王蹟

按馬跑泉蹟太多聞喜與霍州二泉

容可

信

瀑布泉在縣西三十里栢林村後水自山峽中三疊而

下土人名疊水崖

野狐泉在縣北二十里南流合社村戶頭二泉 李汝

寬曰乃白土溝之上游北枕高阜下臨巨壑四面皆

石水自半山中出潺潺有聲至壑底高數丈其底可

容萬馬而南去水口不容一舟

郭堂泉在中條山之麓有巖焉砢研洞豁縱廣丈餘內有懸泉一滴即郭景純置硯地也

湫池在湯寨中條削壁千仞上有湫池徑丈許旱不涸澇不溢邑志曰可方華嶽洗頭盆故名靈池

河津縣

紫金山在縣北三十里盤踞四十餘里東連雙峰黃頰姑射諸山至稷山界西連韓城梁山界北連鄉寧諸山實脊梁山東表境也有五峰巔高八里有雲中寺

古塔數十里外有八十盤砌石為道折旋八十曲麓
有雲峰爪峪泉出此 左傳梁山晉望杜預註在馮
翊夏陽縣北也 公羊傳梁山河上山 顏師古漢
書註梁山在夏陽 括地志龍門山在韓城縣北十
五里梁山在韓城縣東南十九里雍州境也 禹貢
錐指尸子呂氏春秋淮南子所稱呂梁山即禹貢之
梁山也春秋成公五年梁山崩公羊曰梁山河上山
穀梁曰壅遏河三日不流水經河水南出龍門口注

云昔大禹導河積石疏決梁山謂斯處也即經所謂
龍門矣魏土地記曰梁山北有龍門山大禹所鑿通
孟津河口廣八十步巖際鐫迹遺功尚存河水又南
逕梁山原東山在夏陽縣西臨於河上謂夫梁山之
崩能壅河則俯瞰河流可知信為禹鑿之餘三子所
稱呂梁即此山之別名矣酈道元謂呂梁洪巨石崇
竦壁立千仞又謂在離石北以東可二百餘里閻百
詩為之辨曰道元言呂梁之水勢與龍門無異而以

為在離石離石明之石州改名永寧州者必求其地
以實之水寧州東北則今靜樂縣苛嵐州之地西去
黃河約二百里無所謂河流也土人欲當以河曲縣
西南二十五里天橋峽亦有禹鑿之跡天將陰雨激
浪如雷幾相似矣而無所謂千仞巨石又南去離石
四百餘里皆與酈註不合當闕疑百詩言甚數今大
同府平魯衛西亦有呂梁山近志以酈氏所言者當
之則更在河曲之北去離石愈遠矣總由不知呂梁

即龍門之南山而移其名於他處耳且使呂梁果在
離石縣北則西南距孟門六七百里未鑿不足為其
害三子先言龍門次言呂梁其為夏陽之梁山無疑
也列子又有呂梁為孔子所觀者酈道元謂在呂縣
泗水之上今徐州東南五十里呂梁山是也其下即
古泗水金元以後為黃河所奪而泗殫為河禹河未
嘗經此傳同叔以此為禹鑿之呂梁謬極矣

洞兒山乃紫金之別峯也山勢魏峻緣石磴而上巨石

似欲墮巔有佛洞西南為雲中寺山下有井水與井
平不涸不盈 文中子登雲中之城望龍門之關曰
壯哉山河之固賈瓊曰既壯矣又何加焉子曰守之
以道降而宿於禹廟觀其碑首曰先君獻公之所
作也其文典以達

雙峯山在縣北四十里兩峰竝峙遮馬峪界其中萬山
至此豁然開朗為西磴口中有石當山屹立似屏適
承其闕薛文清西磴行曰兩峰秀出半空裏錦屏屹

立當中尊又入為上馬臺相傳關忠義上馬地道有周將軍倉足跡溝中巨石似駒駒項涌泉前後有二石駒差小又入為大小石峽巉削厲屈曲似犬牙乃秦晉孔道也

遮馬峪在紫金山西北自西磴村入山歷石棧里餘兩峯牆立五眼泉自北而下中有大石橫亘似閘限水齧兩涯似側甕注水成潭曲折東下下復有潭方廣數丈水清見底流為石渠胥亘石底行三十里而達

龍門入於河

西磴口中有清泉連鄉寧縣界

爪峪在紫金山中袤二百里兩山對峙峪口西為篩兒
崖緣徑陟崖十里崖突出山半距地三丈泉出石壁
薜荔者五六似瀆米漉篩形北有石龍巔平廣二丈
泉淥出薜荔如注下胥巨石北有山半瀑布泉直瀉
百尋又繇水石中入兩山如牆亭午不見日月又深
入有雙扇門油鍋泉婆婆泉諸勝峪南二里為鴉兒

石多慈鴉峪分三澗形如爪字

棗莊山在縣西北三十里巉巖峭削石磴盤空多虎

洞兒棗莊二山胥鄉寧船窩鎮道土人名西山薛文

清詩所謂北山翠嶺界天碧也

午芹峯在西磴口內紫金之支峯也上有五芹洞下為

芹溪以產芹菜名一名石峪元稷山二段先生讀書

於此 段克已贈答封仲堅詩午芹多奇峰流水出

其左又詩序曰吾兄同仲堅采鷺鷥藤於午芹之東

溪

白虎岡在縣東十五里接臥麟山平岡屈曲前臨汾水
薛仁貴故里也

紅蓼灘在白虎岡下百底村一名射雁灘薛仁貴射雁
於此

疏屬山在縣東南十里一峰壁立汾水遶其下 縣志
文中子故居在山南十里通化村 山海經疏屬山
名枕汾水 文中子曰疏屬之南汾水之曲有先人

之敝廬可以蔽風雨有田可以具饘粥或云臨河者

非

按文中子故里臨河固非而通化村亦非
姑射之西汾河之北當以傍通峪為正

黃沙嶺在縣西五里袤二十里有奇廣十里嶺上有后
土祠沙積平牆風輒蕩去不侵殿宇

馬鞍山在縣北三十五里高四里形似馬鞍唐地理志
名馬鞍塢一名高鞍塢水母廟下出泉名神峪塢東
有雲頭堡高阜有羅漢洞

神峪在瓜峪東二里馬鞍山下邃三里峪上水母廟下

有巨石孔盈尺清泉沸湧味特甘廟左又有泉名蓮花池

姑射山在縣東北三十五里接稷山絳州境山麓為卧麟山縣治倚焉 王思誠記縣治北土山也

黃頰山在縣東北四十里山半有袁達寨一峰屹峙又有傍通峪峪口東西山對峙入峪二百武山迴澗曲峯巒四合東巖下有新舊石城巖仰出似抱腹城倚巖甃石為之新城北有石壁高四丈中開罅相距

尺許內有石潭似仰甕泉湧滙為池名蓮花池池水流石間循峪出即白牛溪也溪上名和尚纏有永興禪寺明季東山卸今多斷碑即文中子授經地也有東臯子黃頰山詩石刻西山由峪口北上路峻名閻王坡數里復折東北有石樓上狹下廣狀方正似樓東山壁立崩崖尤峻削西崖有文中子洞洞北百武繇佛殿陟石梯而上又架木梁梁西為王績洞峪外壤廣衍即東臯也東隣姑射山接稷山縣界直南汾河似

帶東臯下為南渚去峪五里有奇東臯子棲此賦之
獨居南渚時遊北山西窮馬谷北達牛溪馬谷即遮
馬谷也入峪一徑溪水界焉今名牧羊道黃頰山詩
別有清溪道斜經碧巖隈賦云往往溪橫時時路塞
峪內多雜卉又有石韭石茶北山諸峪多輿阻獨馬
峪紆邃多巖洞居人耕嶺上并事牧獵緣嶺十里為
寺家溝鄉寧縣境 王思誠圖王績棄官隱黃頰山
以琴酒自娛貞觀十八年撰隋書今縣東有東臯村

傍通峪在神峪東三里四山迴合林木蒼鬱有清溪即
文中子白牛溪也劉禹錫王通碑在隋朝諸儒惟通
能明王道隱居白牛溪游其門者皆天下雋傑王績
遊北山賦序西窮馬谷北達牛溪

天羅峪在傍通峪東北山五峪西為雙峰之遮馬峪中
為紫金之爪峪迤東為馬鞍之神峪又東為姑射之
傍通峪又東為天羅峪

卧麟山在姑射山麓下即縣治

我崑嶺在汾水南即汾原聯萬泉滎河境南五里有高
原亦名我崑山

黃河在縣西十五里北自鄉寧縣船窩鎮南出龍門山
西南流入滎河界隸縣境共百三十五里西北出鄉
寧境古距縣二十五里西南入滎河境古距縣四十
里後河東徙今縣西距河十里西南距河二十餘里
顏師古注西河即龍門之河也在冀州西故曰西
河 錯開河在禹門上河西畔相傳禹欲于此開鑿

後復審勢乃改鑿龍門云 禹王墳在龍門南五里
大河中石磧廣袤五六里高尋丈洪濤不能侵巨石
嶽崎不相聯屬

龍門在縣西北二十五里兩山壁立中通河流形如門
闕一名禹門東西闊八十步西與韓城梁山竝峙

魏土地記梁山北有龍門山大禹所鑿通孟津 正
義禹鑿廣八十步 顏師古註積石山在河關西羌
中龍門山在夏陽北言治河施功自積石起鑿山穿

地以通其流至龍門山也自龍門南流以至華陰又折而東經砥柱李復曰禹鑿龍門起於唐張仁愿所築東受降城之東自北而南至同州韓城北安國嶺而盡孔安國曰龍門山在河東之西界又曰龍門之河在冀州西水經南龍門山在河東皮氏縣西尸子龍門四旁有山莫能上大魚薄集龍門上則為龍不上輒曝腮水次故曰曝腮地形志華山郡夏陽縣有梁山龍門山黑水城是梁山龍門山折

為二也 五朝志汾陰有龍門山河東又有龍門縣
是龍門山不隸龍門也 顏師古曰龍門山在龍門
縣北 元王思誠圖臨思閣在龍門山頂俗謂之看
河樓下有水樓所以汲水於河也 薛瑄龍門記出
河津縣西郭門西北三十里抵龍門山下東西皆層
巒危峰橫出天漢大河至西北山峽中東至是山斷
河出兩壁儼立相望神禹疏鑿之勞於此為大繇東
南麓穴巖構木桴虛駕水為棧道盤曲而上瀕河有

寬地可二三畝多石少土中有禹廟宮曰明德制極
閔麗 喬宇龍門山記河之西是為陝西韓城之境
其山亦自北而來亦號龍門與東岸之山相照而斷
三秦記云龍門外懸泉而兩旁有山水陸不通魚鱉
莫上今觀之誠若此 龍門山有石洞蓋文中子避
亂隱居之所 王刁洞在龍門山巖際 王履華山
圖聞王刁三洞在山外西崖上中藏古書甚多然無
由至龍門王刁洞當繇近華山而名 姜真人善信

洞在河西山半崖援鐵絙以登爾雅註鮪魚似鱸
色青黑大者長七八尺岫居春始上而游揚北入河
西上龍門得過者化為龍否則點額而還拾遺記
禹鑿龍門至空巖得伏羲玉簡長尺有二寸及八卦
圖周太祖狩於龍門帳下楊忠獨當一猛虎左挾
其腰右拔其舌太祖壯之北俗謂猛虎為掩于因以
字之唐盧虔字子野永泰初舉進士高第仕至銀
青光祿大夫工部尚書幼讀書於龍門深知易著春

秋孝經解 魏景明四年公孫崇表臣謹即廣搜柘
黍選其中形又採梁山之竹更裁律呂製磬造鐘依
律竝就 洛陽西南三十里闕塞山服虔謂南山伊
闕是也一名龍門山吟咏最多其它赤城峩嵒棧閣
等地胥易譌

汾河在縣南八里自稷山縣西達張家崖合黃河隸縣
境共五十五里有渡二一曰蒼底渡一曰湖潮渡

汾水東自稷山界入縣境西南來至榮河汾陰后土

祠下入於河明隆慶四年東徙至縣西南二十里胡
盧灘即入河 王思誠總圖汾水渡北張渡在縣東
二十里吳村渡在縣東十里修福渡在縣南八里連
伯渡在縣西南十里黃村渡在縣東南二十里又云
汾水在縣南八里西南十五里入河 水經又西過
皮氏縣南 水經注汾水西逕鄧邱北故漢氏之方
澤也賈逵云漢法三年祭地汾陰方澤澤中有方邱
故謂之方澤邱即鄧邱也許慎說文稱從邑發聲河

東臨汾地名矣在介山北汾水又西逕耿鄉縣北故殷都也帝祖乙自相徙此為河所毀故書叙曰祖乙圮於耿杜預曰平陽皮氏縣東南耿鄉是也盤庚以耿在河北迫近山川乃自耿遷亳後晉獻公滅之以封趙夙後襄子與韓魏分晉韓康子居平陽魏桓子都安邑號為三晉此其一也漢武帝行幸河東濟汾河作秋風辭於斯水之上汾水又西逕皮氏縣南竹書紀年魏襄王十二年秦公孫爰率師伐我圍皮氏翟

章率師救皮氏十三年城皮氏者也漢河東太守番
係穿渠引汾水以溉皮氏縣故渠尚存今無水

遮馬峪泉水在縣東北四十里一原坡下唐貞觀十年
縣尹長孫恕鑿山修為二渠元大德間千澗渠雨衝
絕明隆慶五年知縣張汝乾復鑿山通之

爪峪泉水在縣東北四十里水母廟下亦長孫恕鑿
西澗水自遮馬峪西南入河明薛文清故鎮行還復崎
嶇歷西澗寨棠競涉波凌亂

艷掌溝在艷掌村東袤十里有奇入大澗溝多葦

篩兒崖泉劉梁嵩記走爪峪達篩兒崖踰龍神廟少北
泉流乳崖亘山半形覆似箕可名箕山土人執為篩
殊不可解厓皴類浮山石少堅泉滴胥垂乳聯貫成
行而水尤清冽

東渠王績薛記室收過莊壯見尋詩憶我少年時携手過
東渠梅李夾兩岸花枝何扶疎無功又有夜還東溪
詩

北溪王績晚年叙志示翟處士正師詩歸來南畝上更
望北溪頭古岸多盤石春泉足細流

救命天澗廣一里深二丈袤二十有餘里爪峪千巖萬
壑流胥滙此漂巨石似凋葉直瀉汾河

南下澗 西長澗在鴉石西

爪谷堰在龍門北三十里唐志貞觀十年築 爪谷析
三澗西南為西長大澗南為南下大澗東南瀉汾河
為救命天澗

稷山縣

稷神山在縣南五十里東連聞喜西連萬泉南連夏縣
峯巒層出相傳后稷教稼地一名稷山下有灑灑泉
唐志有稷山 水經注汾水又逕稷山北在水南
四十餘里山東西二十里南北三十里高十三里西
去介山十三里山上有稷祠山下稷亭春秋宣公十
五年晉景公治兵於稷以畧狄土是也

姑射山在縣北二十里石壁秀峰上有姑射洞北至滴

水巖隸鄉寧境

紫金山在縣西北三十里有峪洞時有飛雲

峩嵎嶺在縣南四十里東西袤二十里遞高九里八十
步盤踞十五里山有兩峰彎環凝翠望若修眉南峰
尤高

崑崙山在縣西北三里土山空窳中多故蛤

仙人掌在紫金山上有掌痕承月狀

青陽峽在紫金山內段克已有遊青陽峽詩

馬壁峪中有清泉

聖王山在縣北三十里西連紫金山又西連姑射山西
至河津縣界止東西袤四十里遞高九里盤踞十二
里北接鄉寧縣界山有五峰中峰尤高有馬壁晉家
黃花三峪迤出羣山

馬頭山在縣東北三十里西連馬壁峪上有袁達寨

汾河在縣南二里繇絳州下王村界起至河津縣薛村
界止隸縣境共七十二里半東界下莊村渡至崔村

五里下費村十里上費村五里苑曲荆平李村陽村
胥十里薛村渡十二里半 金志有稷山汾水 水
經注汾水又逕冀亭南昔白季使過冀野見郤缺耨
其妻饁之相敬如賓言之文公文公命之為卿復與
之冀京相璠曰今河東皮氏縣有冀亭古之冀國所
都也杜預釋地曰平陽皮氏縣東北有冀亭即此亭
也汾水又西與華水合水出北山華谷西南流注於
汾汾水又逕稷山北

魚兒灣在縣東七里汾水之灣魚所聚也

黃華峪澗在縣西北至河津縣界有東澗西澗乃清水也水經注汾水又西與華水合水出北山華谷西南流逕一故城西俗謂之梗陽城非也梗陽在榆次按漢故上谷長史侯相碑云侯氏出自倉頡之後踰殷歷周各以氏分或著楚魏或顯齊秦晉卿士為斯其裔也今蒲坂北亭即是城也其水西南流注於汾葫蘆泉在縣北二里佛閣寺西形似葫蘆

晉家峪澗在縣北內有浸水遇雨有猛水東曲渠乃猛水也

馬壁峪澗在縣東北接絳州分東路中路西路乃猛水也

甘泉在甘泉村東北元大貞觀碑稱縣為甘泉邑
碧水泉在賈家莊會葫蘆泉入汾

白楊泉在小杜村入汾

絳縣

太行山在縣東二十里山極高險西北諸山多其支脉
隸縣境者高五里盤踞十里東連紅嘴溝一里南連
轍木霍一里西連暗峪溝二里北連石崖有一峰山
半有石洞雲時飛出

絳山在縣西北二十里接聞喜曲沃縣高三里盤踞六
里有西南北三峰北峰尤高山下有沸水一名紫金
山草木不生土色赤州縣胥取名焉

產鐵

華池山在縣東十五里高二里盤踞五里東連神溝南

連長嶺西連石匣溝北連廟坡有一峰

沙峪在縣東三十里壁峰峭絕

河王峪在縣東三十里通沁水縣界

續魯峪在縣東五十里通沁水縣界

歪頭山在縣東六十里遞高五里盤踞七里

太陰山在縣東南十五里遞高五里盤踞十二里東連

陽家峪南連石崖西連西蒿池北連胡嘴坡中有一

峰崖壁峭絕陽光不及

陳村峪在縣東南十五里垣曲縣界

紫家峪在縣東南十五里

青陵山在紫家峪多虎

湫池山在縣南十五里高二里盤踞五里東連坑兒溝
南連索駝腰西連崔家凹北連錢家嶺有一峰上有

湫池建龍祠

冷口峪在縣南十五里四時多風盛夏恒冷

存雲嶺在縣南三十里高三里盤踞五里南連關牛嶺

西連胡凹嶺北連連家嶺一名鳳凰山有姜嫄塚建廟秩祀

橫嶺山在縣南四十里高一里盤踞四里山胥土石東南跨垣曲縣界名大橫嶺聞喜東南九十里乃小橫嶺也山下有三泉多白石名白石河

白雲洞在太行山西面深二丈有奇出石鍾乳洞吼三日輒雨洞外磨崖刻釋氏經一卷後注晉天符五年

白雲子書

按晉無天符年號疑天福之誤也

教山金志有太陰山教山絳水

朝陽洞在牛村東畔溝巖下

黍葭谷 清野山 哈口

絳水發源城西溝中至楊村十里引渠溉田 水經注
澮水又西南與絳水合水出絳山東至寒泉奮湧揚
波北注懸流奔壑十一許丈青崖若點黛素湍如委
練望之極為奇觀矣其水西北流注於澮應劭曰絳
水出絳縣西南蓋以故絳為言也 通考有絳水

明一統志智伯言絳水可灌安邑即涑水上流也

涑水發源縣東南十五里自陳村峪東迤出復流地中
至柳莊復出西流入聞喜界 水經涑水出河東聞
喜縣東山黍葭谷 水經注涑水所出俗謂之華谷
至周陽與洮水合水源東出清野山世人以為青襄
山也其水東大嶺下西流出謂之唵口又西合涑水
澮水在縣東北四十五里發源翼城縣東北龍爪溝東
流二十里至大交鎮又至鎮西三里合故郡水復流

至翼城合雲莊二里又至絳州入於汾

當是澮交澮入澮之水澮

灘在縣東北澮流環繞羣雁來集

沸水發源縣北十五里絳山下村名沸泉 絳水即沸

泉溢為池方廣半畝池底泉無算涌而突上北至沸
泉莊水出石罅流寢巨又北流半里至曲沃景明村
界趨青玉峽

逆溝水源出縣東八里王家窰坡下北流入曲沃閭村

莊

拔劍泉在縣東四十里晉峪莊相傳晉文公豎劍拔而得泉後涸

玉龍泉在縣東五十里東賀水村合大交鎮澮水帶溪水在縣東南二十里

聖水源出縣西十里楊村晉太康間楊斛耕田湧三泉疾者飲之輒愈今甘苦異味禱雨多應

馬跑泉在縣西十里楊村旁有太陰將軍祠

故郡水源出縣東北四十里故郡莊方二畝其深不測

分三渠一故郡一陳景一大交胥流入澮水

垣曲縣

太行山在縣北八十里東北抵陽城延袤八十餘里土人名鋸齒山

王屋山在縣東北六十里山勢巍巍東北抵陽城東抵河南濟源禹貢底柱析城至於王屋正義王屋在河東垣縣東北水經濟水出河東垣縣東王屋山通典垣東北有王屋山沅水所出鼂氏書注在

河東垣曲縣山形如屋故名 元和志王屋山在王

縣北十五里周百三十里高三十里 王屋山志在

濟源縣西北百里李濂記在濟源縣西百里 附考 古

今輿地名山方七百里高萬仞本冀州之河陽山也

泰山為東頂武當為南頂天壇為西頂王屋山志

王屋山絕頂曰天壇山峰突兀東曰日精西曰月華

上有石壇名清虛小有洞天 壇屋山 河南永寧縣西四十五里

巔平如壇高如屋禹嘗叙 九疇於此一名天壇山 巔曰天壇常有雲氣覆之

輪囷紛郁雷雨在下飛鳥視其背為仙靈朝會之所

麻籠山

西九十里
天壇山北

八仙嶺

西九十里
天壇山東

九芝嶺

西九十里

陽臺宮

仙猫洞

天壇山上

王母洞

天壇山東北淵深莫測
相傳王母修道于此有

上下
二洞藏花洞

陽臺宮前下出泉水四時赤綠紫白異
色相傳昔有汲水者見其中蓮花出焉

黑龍洞

五斗
峯內

華蓋峰

西九十里
陽臺宮後宋徽宗游幸所

濟源池

水發
源於

王屋山頂五斗峯下之太乙池乃伏流地中東行九
十里復見於濟源縣西三里滙為二池謂之濟源池

太乙池

天壇山上
濟水出此

仰天池

縣西王屋里四
面高而中凹

煉丹池

天壇

山頂相傳老子煉丹於此

避秦溝

王屋山下
淇水出焉

淇水

源出王
屋山

大峪澗

西七十里源發王屋山南入於河

望仙溪

西八十里源出王屋山北其水伏流南入於河燕

家井

縣西王屋里燕真人號烟蘿子嘗於此洗參食之

關龍逢祠

西南百里山志

山形如王者車蓋故名

博物志山在東狀如垣

京兆人韋文秀隱於嵩高魏世祖徵詣京師問金丹事文秀曰臣昔者受教於先師曾聞其事未之為也世祖遣與尚書崔頤詣王屋山合丹竟不能就唐開元中天台司馬承禎被召至都元宗詔于王屋山置壇室以居善篆隸上命以三體寫老子刊正句文

又命玉真公主及光祿卿韋縉至所居按金錄設祠
厚賜焉 溫造隱王屋山人號其居曰處士墅 水
經注教水出垣縣北教山南逕鋪山高三十餘里上
有泉不測其深頂山周員五六里少草木山海經曰
孟門東南有平山水出於其上潛於其下又是王屋
之次疑即平山也 平山當即王屋支峰或垣曲濟
源山別名也 杜甫憶昔行曰憶昔北行小有洞洪
河怒濤過輕舸辛勤不見華蓋君良岑青輝慘么麼

千崖無人萬壑靜三步回頭五步坐

良岑石閣晉天壇佳勝也

參自潘陵尖還少室詩昨詣山僧期上到天壇東向
下望雷雨雲間見回龍 史記魏武侯二年城王屋

中條山在縣西南九十里迤邐至縣郭南一里為條山
尾下臨黃河南有葛伯古城

臯落嶺在縣西北四十里相傳東山臯落氏址 水經
注清水東流逕臯落城北服虔曰赤狄之都也世謂
之倚亳城蓋讀聲近傳因失實也春秋左傳所謂晉

侯使太子申生伐東山臯落氏者也與倚毫川水合
水出北山礦谷東南流注於清 通典垣有古臯落
城西魏於此置邵郡以備東魏 通考垣有古臯落
城即周召分陝之地今縣界東北六十里有邵原廟
與古棠木西魏於此置邵郡以備東魏 公羊傳自
陝而東者周公主之自陝而西者召公主之禮記八
伯各以其屬屬於天子之老二人分天下以為左右
曰二伯陳澔白八伯為八州之伯二伯則天下之伯

也

瞽塚山在縣北五十里一名鼓鐘山 山海經鼓鐘之
山帝堯之所以觴百神 水經注教水南流歷鼓鐘
上峽懸洪五丈飛流注壑夾岸深高壁立直上徑崖
秀舉百有餘丈峰次青松巖懸頽石於中歷落有翠
栢生焉丹青綺分望若圖繡矣水廣一十許步南流
歷鼓鐘山分為二澗一澗西北出一百六十許里山
岫迴阻纔通馬步今聞喜縣東北谷口猶有乾河里

故溝存焉一水歷治官西世人謂之鼓鐘城城之左
右猶有遺銅及銅錢也城西阜下有大泉西流注澗
教水合伏入石下南至下峽 舜王坪接陽城盤亭

山水經注叙景物雅似盤亭河

按藉塚當即鼓鐘之
謠舜王坪舜井胥傳

會至謂舜井旁有
匿空旁出井尤鑿

一名鳴條山相傳瞽瞍葬此又傳

昔有金牛入洞人投石擊之水出後遇旱時投石

馬逢造記北四十里大舜浚井在焉東有大阜為瞍
塚南有諸馮北有歷山東南有雷澤東北有耕田遺

蹟

鳳凰山在縣東一里形似飛鳳

黛眉山在黃河南浮嵐似畫

獅子山在黃河南黛眉山右麓形似獅子

掛榜山在黃河南

雞籠山在縣西南三里

趙家嶺在縣西南十里

仙人洞在縣西南十五里石柱鐫宋靖康元年避亂行

數十武聞水聲

鷹嘴山在縣西南五十里黃河遶其下

歪頭山在縣西南七十里登巔望聞喜夏二縣有清澗

二泉

鳳化嶺在縣西五十里小趙村

風翻嶺在縣西五里小趙村北

牛山在縣西三十里

虎兒山在縣西四十里近古青廉城上有風洞相傳宋

將楊宗保探穴地

青廉山在縣西四十里後魏割聞喜夏縣東青廉山北
置青廉縣隋廢復置唐廢今名青廉里 金志垣曲
有王屋山清廉山黃河清水

墨山在縣西五十里王右軍讀書語涉傳會 五朝志
垣有黑山今郡縣志不載疑謠黑為墨

風山在縣西六十里為橫嶺關入口地多風 元宋景
祥興建沿革記縣五州二百三十里自冷口崎嶇盤

磳行七十里始得民廬

龍骨山在縣西七十里

椅山在縣西七十里

轉山在縣西七十里連橫嶺山山勢迴折

橫嶺山在縣西八十里嶺上分垣絳界背有橫嶺關巡

檢司

白雲洞在縣西北百二十里洞深二丈內有石鐘白雲

子棲此

栢廟嶺在縣西北三十里

鞍子山在臯落西一里

華綠山在縣西北五十里

懸泉山在縣西北六十里

聖人嶺在縣西北七十里上有麻姑祠

火石嶺在縣西北九十里

蜂腰峽在縣北五里

神嶺在縣北二十五里澄坂村

蒼菇山在縣北三十里懸岡過峽

佛山在縣北三十里上有古刹舊志訛浮山

寨子山在縣北三十里相傳十八村民避金兵於山上
獲金因祀山神焉山即佛山之支也

牛心山在縣北四十里以形似名

金牛洞二一在縣北五十里瞽塚山一在寨子山北相
傳怪獸踏田形類牛色似金逐之徐隱入洞中洞口
有潭人莫能追云歲旱禱輒雨

諸馮山在縣北五十里山最明秀相傳舜生此

鑼鼓洞在瞽塚山西

歷山在諸馮山後巔平廣土人名舜王坪即瞽塚山之
嶺也東西十餘里南北十里相傳舜耕於此至今荆
棘不生上有石碌軸數百下有舜井暨娥皇女英祠
又有淘米泉

折腰山在縣北七十里劉張村相傳有銅鑛鑿久脊摧
魏熙平二年尚書崔亮奏弘農郡銅青谷有銅鑛

計一斗得銅五兩四銖葦池谷鑛計一斗得銅五兩
鸞帳山鑛計一斗得銅四兩河內郡王屋山鑛計一
斗得銅八兩 銅青谷葦池谷鸞帳山當聯王屋山
在垣曲平陸之間垣曲折腰山銅鑛鑿久脊摧恐屬
古今殊名爾

三錐山在縣北八十里方廣五十里三峰如錐產百藥
濟源山東北十里遙連王屋天壇濟水發源於此

覆釜山唐志有琴瑟穴有銀穴三十四銅穴四十八在

覆釜三錐五岡分雲等山

馬頭山地形志陝州澠池郡領縣二俱利北澠池太和
十一年置有馬頭山俱利城生耳山

五岡山

分雲山

白馬山

生耳山

黃河在縣南一里河九曲此為一曲也西南由南門至

濟民渡五里北岸乃垣曲之東灘村南岸乃澠池之
洋湖村也又至利民渡十里北岸乃垣曲之寨內村
南岸乃澠池之南村關也黃河自三門而下兩岸高
山夾流水尤湍急至孟津縣始平 隋開皇初邵州
人楊堅名下云八方天心 王邵上書帝任政河曲
有楊堅名下云八方天心 王邵上書帝任政河曲
出者言親任政事而邵州河濱得石圖也

沅水在縣東半里濟水支流南流入黃河漢時流至東

北二十里石家溝滲入不見復繇黃河瀕出一名
湛水祝志湛水出河內軹縣舊名舜清河 水經注
鼓鐘城西阜下泉合數水伏入石下南至鼓鐘下峽
其水重源雙發南至西馬頭山車載坡下又伏流南
十餘里復出又謂之伏流水南入於河 山海經教
山教水出焉又南流注於河是水冬乾夏流實惟乾
河也今世人猶謂之乾澗矣 沆水當即西馬頭山
車載坡下水土人以其伏流似濟故謂之濟水支流

鄭玄曰地理志沅水出河東東垣王屋山東至河
內武德入河溢為滎 括地志沅水出懷州王屋縣
北十里王屋山頂崖下石泉涇瀆不流其深不測至
縣西北二里平地其源重發而東南流為汜水 李
濂濟源池記山海經曰王屋之山瀰水出焉而地理
志亦曰王屋山沅水所出瀰沅聲相近蓋一水也沅
水即濟水故禹貢曰導沅水東流為濟夫濟之為水
瑩潔如玉性下勁疾貫大河而不濁故釋名曰濟源

也言源出河北濟河而南也 唐文德元年二月汴
將丁會牛將節救河陽節度使張全義敗河東兵於
沈河

亳清河在郭南發源橫嶺山下繇關店河順流而東經
郭南入黃河有石堤護城 水經注清水又東逕青
廉城南又東南流又會南溪溪水出南山而東注清
水又東合棗澗水水出左人嶺下南流俗謂之扶蘇
水又南歷豳苗北馬頭山亦曰白水原西南逕垣縣

故城北 史記魏武侯二年城安邑至垣即是縣也
其水西南入清水清水又東南逕陽壺城東即垣縣
之壺城東即垣縣之壺丘亭晉遷宋五大夫所居也
清水又東南流注於河

西泉在城內西南隅

清水泉在縣西南三里辛莊村

板澗河在縣西南三十里

清水河在縣西南五十里

五虎澗在縣西南五十里

華露澗在縣西南五十里回村

板澗在縣西南五十里

孝子泉在縣西一里孝子廬墓前湧出

滴水泉二一在縣西十里下毫村南懸崖丈餘滴水如雨一在縣北一里

黑龍潭二一在縣西十五里柳莊村一在縣西三十里

南莊村禱雨輒應

王公泉在縣西二十里王茅鎮

五龍泉在縣西二十五里相傳白羊化龍於此

蘇家澗在縣西三十里

火星澗在縣西四十里

關店河在縣西五十里

白澗河在縣西五十里

沙金河在縣西六十里

白水澗在縣西下毫村東

煖泉二一在西王茅鎮一在北塏坂村

園子河在縣西北二十五里源出橫嶺南流入黃河

白馬泉在縣西北六十里上王村

懸泉在縣西北六十里懸泉山半

凝碧泉在縣北十里峪子村山麓湧出一名消瘦泉

金瀾泉在縣北四十里馨塚村發源石旁

帝鄉泉在縣北四十里以舜生鄉名

舜井在縣北四十里舜王坪山後又有一井相傳為匿

空旁出處

連莊澗在縣北峪子村

淘米泉踞磬塚三里歷山下泉水似米汁

春水泉在亳城村東山半

清濁二泉在歪頭山清泉觀

馬跑泉三一在北羊里一在平原里一在下亳里

吉州

壺口在州西七十里每春秋時有氣如虹橫浮水上河

水奔放而下懸注五六百尺漩窩如壺故名禹貢既載壺口即此 水經壺口山在河東北屈縣東 通

典壺口山在今文城郡吉昌縣

通考同

金志吉鄉有壺

口山孟門山黃河蒲水 呂柟龍門山記懸流山級

浪或曰在金門五七十里或曰在吉州百餘里地理

志壺口在河東北屈 括地志壺口山在慈州吉常

縣西南五十里通考慈州晉之屈邑獻公子夷吾所

居壺口之山在焉

孟門山在黃河中流山海經孟門之山其上多金玉其
下多黃堊涅石 淮南子龍門未闢呂梁未鑿河出
孟門之上大溢逆流無有丘陵高阜滅之名曰洪水
大禹疏通謂之孟門 穆天子傳北登孟門九河之
隘 通典文城縣有孟門山與龍門相對龍門之上
古龍門禹所鑿 南鵬詩聞說孟門小來看大似拳
生成書案景疑在畫圖懸

雲臺山在州東五十里半隸鄉寧縣奇峰千仞一名雲

臺郊

高田山在州東百里高出天半一名高天山

錦屏山在州南半里舊傳尉遲敬德出師至此掛甲於

山一名掛甲山

按吉州土人名秦王掛甲山山下棘刺胥直無曲鈎傳為唐太宗遺蹟云

上有晉

文公祠

高祖山在州西三十里峰巒奇拔與人祖山遙相雄峙

舊有漢高祖廟

壽山在州西南山半有觀音洞西有一山層次如級名

九龍堰

管頭山在州西北三十里接高祖山茂林數十里內有

六甲土地廟

庖山在州北三十里迤北而上又三十里至巔上建伏羲廟塋伏羲女媧二像相傳為庖犧氏故宮又傳伏羲始制婚姻之禮名為人祖一名人祖山

風山在州北九十里大寧孔山迤南界有穴如輪風氣蕭瑟又名明孔山 五朝志吉昌有風山

石洞在州北百二十里可容百人中
有泓泉

包山在州東北五十里祝志當即
庖山

明珠山在州東北九十里東接鄉
寧縣界

吉山在州舊城半枕山麓相傳古
不被兵

石鼓山唐志慈州文城縣有孟門
山石鼓山

石門山五朝志文城有石門山

金剛嶺在姑射山

秦王嶺元史吉州有秦王嶺乃鄉
寧界也

黃河繇大寧西南流經州境西南流東注州志乃九曲之一也大天灣河中有石豚唐慈州志禹鑿山河水下趨峻急深七尺經行之處元禁捕魚今山中鑿空架槽濶五十步河水東流懸注七十餘尺魚鱉所不能游號石槽東岸有石槽祠禹之施功始此

蒙泉在州治東發源學宮前又潛伏地底至山下石罅流出入清水河相傳尉遲恭飲馬於此一名飲馬泉味甘而永

明珠川在州東百里相傳昔有明珠耀川為望氣者所獲

南澗在州南西流入黃河

甘泉在西街深八尺味甘

蒲峪小水河在州西五里

寬靜河即鄂水也由寬靜村西流五十里入於黃河當

即嶧谷水 水經河水又南至嶧谷傍 水經注東

北窮澗水源所導也西南流注於河

按鄉寧鄂水自為一河

清水河遼州城北東南流會州東門外環流小水河又
經州城南數十武迤至三官廟前會州東小水河又
迤會錦屏山峽小水河西流五十里入於黃河

根水路史卷章取根水氏今土軍縣有根水是史多作
鄉水非

縣底河發源高田山下經桑阿窰頭回公諸村北流入
大寧縣川當即金志蒲水

石孔飛泉二泉繇石孔中湧出湍瀑飛瀉

鄉寧縣

岱山在縣東十里上有嶽廟

麥家峪在縣東出泉

栢山在縣東十五里孤峰蒼栢上有荀息廟

鄂山在縣東三十里峰嶂巒岼突峙平原中鄂侯之封

以此名 五朝志昌寧有壺口山崿山是壺口山古

隸鄉寧也

高天山在縣東四十里高出羣山雲氣時繞

高嶺在高天山西

豁都谷即官水峪在縣東百三十五里夏秋霖雨西山諸水胥匯於此下通襄陵太平界

三官峪在縣東南四十五里通太平縣界

安分峪在縣東南通絳州稷山界有靈石寺

馬壁峪在縣東南有劍泉由五龍宮通絳州界

尖山在縣南二十里孤峰特出上有廉頗祠

馬頭山在縣南八十里形似馬首山上有黃龍洞

雲丘山在縣南九十里，有龍宮。

白雲洞在南山，石壁鏤佛像，殊奇古。昭遠寺佛龕下出白雲泉。

莊頭峪在縣南，有馬跑泉，通稷山縣界。

石門峪在縣南，由東郊村通絳州界。五朝志文城有

石門山

桑平頭峪在縣南，由郭家集通稷山縣界。

林山在縣西南三十里，上有白起廟。

兩乳山在縣西南七十里雙峰兩乳 周齊王憲入兩
乳谷襲克齊栢社城

滴水崖在縣西南八十里有滴水神泉崖高千仞中有
石洞懸崖滴水多取不竭不取不增有唐時佛龕

塔子山在縣西南百里盤峰侵雲上有雲中寺石塔高
踞山尖

青石峽在縣西南百里巉削峭厲屈曲似犬牙

龐統峪在縣西南通河津縣界古碑作龐通峪又名傍

通峪峪在姑射山東三十五里黃頰山之中兩峰削立石前覆山半石城風雨矢石皆不能及中有清泉不涸不盈峪東高阜曠衍唐王無功隱於黃頰所謂東臯也 河津至鄉寧諸峪胥輿阻惟傍通峪內豁然開朗山迴壤邃林茂溪冽古崖壁上有永興禪寺龕東臯子石刻明崇禎間山倒寺壓石刻遂亡崖下為牛溪所謂別有清溪道也土人名牧羊道

雙栢樸峪在縣西南有滴水崖文中子洞通稷山縣界

香爐崖在縣西百里形似香爐俯臨黃河

秦王山在縣東北西有五條腰

金剛嶺在縣東北近秦王嶺

黃河在縣西百里繇吉州南流入河津縣境河中有

龍尾磧

鄂水在縣東三十里源出鄂山陰宋家溝流經縣城南

合羅峪水煖泉龍王池水西流至西北境八十里師

家灘入黃河水經河水南至崕谷傍又南出龍門

口嶧谷龍門地近當指鄂水鄂侯城豈以鄂谷傳謠耶

暖泉在東門外百武冬不冰南入鄂水

蒿地溝在縣東

馬圈澗在縣東

金剛嶺泉流入縣東

龍王池在縣東南半里石罅流出西入鄂水

馬跑泉在縣東南八十里流入莊頭峪

劍泉在縣東南相傳唐太宗以劍斫山泉隨湧出流入

馬壁峪

溫泉在城南半里高山陽湛然深碧循山麓西流

白雲泉出南山白雲洞淵澄秀澈禱雨時應

柳渠泉在縣西南七十里源出柳樸渠經流上馬臺澗

中入河津縣界

劉家原泉在縣西入縣川

屈家溝在縣北四十里相傳屈產之乘

羅峪河在縣東北三十里源出高天山流經縣城東北
繞城東南合鄂水

溫泉張季霖溫泉亭記鄂山腹有溫泉自石潭出迤流
而西半里至昭遠山門栢陰下從石龜口出淙淙有
聲下匯為池池物西流折而北下沿山麓圃人分引
之資灌溉可愛也

隰州

州在萬山之中山高若干暨盤踞若干里數難覈就縣志縣冊錄之

蒲子山在州東北五十里蒲縣界遞高十五里盤踞三

十里連妙樓山蒲伊子隱此相傳為帝堯之師漢以
山名蒲子縣

堆金山在城東遞高二里盤踞十里

白衣山在州東三十五里遞高十里盤踞三十里有白
衣居士棲此上建廟

暖水窰山在州東六十里遞高二十里盤踞三十里山
半有泉泉側有寺

紫荊山在州東七十里極高峻遞上三十里巔可望五

百里盤踞百里連暖水穴山東有龍泉寨上有潤民
侯廟 明龍泉院記山在諳真鄉迤東十里勢接雲
霄東覽霍山汾水南瞰五鹿高峰西望華岳恒河北
連上殿山頂乃普照龍尾古刹

飲馬山在州東九十里遞高四里盤踞三十里相傳漢
文帝馬至此乏水跑地出泉飲之山生草似韭可食
五鹿山在州東南七十里遞高八里盤踞三十里上有
五鹿大夫廟 五鹿姬姓風俗通衛邑也晉公子重

耳封舅犯於五鹿支孫氏焉代郡成陽縣有五鹿氏
又曰凡氏於職三烏五鹿

昇仙洞在州西北六十里仙洞山土人傳時聞仙樂云
水簾洞在州西北七十里

千佛洞在州北十里佛陀灣

海架山在州北十五里高一里盤踞二十里

神峪山在州北五十里遞高十五里盤踞三十五里有

千佛洞像以千計佛座下有風洞

暖占山在州北五十五里遞高十五里盤踞七十里連
神峪山

妙樓山在州北七十里遞高五里盤踞四十里石巖高
廣內有石室又石崖高壁有龍泉冬夏不竭隰州石
樓山指此

野峰山在州北七十里王家溝遞高六里盤踞三十三
里

風子山在州北八十里龍神店遞高十五里盤踞四十

里

黃崖山在州北八十里黃崖村遞高二十里盤踞五十里連石樓縣界

黑龍溝山在州北九十里遞高四十里盤踞百五十里五龍鬪寶山在州北百里交口河遞高二十里盤踞八十里

寺郵山在州北百里遞高三十里盤踞八十里在韓村里

貨郎山在州北百五里化容裏遞高二十里盤踞六十里

聖天山在州北一百十里遞高二十七里盤踞五十八里連石樓縣界上有興教寺

抱兒峪山在州北百三十里遞高三十里盤踞百里

石窰山在州北百三十里遞高三十里盤踞百三十里石窰山在州北百四十里遞高七十里盤踞二百里連

靈石縣界

玉皇山在州北百四十里遞高十五里盤踞六十里

王家山在州北百五十里遞高十里盤踞三十里

巒岩山在州北百五十里遞高二十里盤踞百八十里

連東宬山

東宬山在州北百七十里遞高九里盤踞五十里

桃花山在州北百七十里遞高五十里盤踞百二十里

連寧鄉縣界

石花山在州北百八十里遞高七十里盤踞百七十里

連孝義縣界

鳳凰山在城北李呈祥千佛菴碑出北門而望有山翼然面繞城堞背擁岡巒大河平涵旁溪縈帶山形倚伏脉絡縱橫燕僧道亮住錫此山更名鳳凰取其似也

慈閣山在州東北五十五里遞高二十里盤踞四十里下墩山在州東北六十里遞高二十里盤踞五十里石馬山在州東北六十里遞高七里盤踞五十五里連

下坂山 金志隰州有石馬山石樓山 水經蒲川
石樓山當指此 明一統志山形如馬

石秀才山在州東北六十里遮高八里盤踞四十里
大樹嶺在州東北八十里

樺樹山在州東北百里遮高三十里盤踞百五十里

孔家莊山在州東北百二十里遮高九里盤踞四十里
南陽山在州東北百二十里遮高八里盤踞四十里連

汾西縣界

許家嶺在州東北百三十里

龍尾山在州東北百三十里遞高九里盤踞五十里連汾西縣界

翠屏山在州東北百三十里遞高十里盤踞六十里連汾西縣界

誤兒山在州東北百三十里遞高五里盤踞四十里

金華山在州東北百四十里遞高六十里盤踞百四十里

鷓石巖山在州東北百四十里遞高三十里盤踞百里
連靈石縣界

玉堂山在州東北百五十里遞高四十里盤踞八十里
連汾西縣界

中華山在州東北百五十里遞高十五里盤踞七十里
相傳劉武周屯兵於此

永遠山在州東北百五十里遞高五十里盤踞二百里
連孝義縣界

西莊山在州東北百六十里遮高四十里盤踞九十里
連孝義縣界

靈巖山在州東北百六十里遮高七十里盤踞百八十
里連靈石縣界

馬港山在州東北百六十里遮高十里盤踞八十里連
靈石縣界

盤龍山在州東北百六十五里遮高十里盤踞五十里
連靈石縣界

火臺山在州東北百七十里遞高三十里盤踞百二十里連靈石縣界

董家塌山在州東北百七十里遞高二十里盤踞八十

里連孝義縣界

百花山在溫泉南距州百三十里遞高七十里盤踞一百十里

鄭家嶺

洪福山

雞山唐志忤城有雞山

青灰山宋大中祥符初隰州兵馬監押趙振捕盜于青
灰山殺獲甚衆

白蓮洞在土同里

土同里礪石洞內有仙蛻

紫川源出州北諸山南流經忤城鎮至大寧馬鬪關入
黃河岸不生草木水不產鱗介以川側巖石色胥紫
故名

義泉河在州東自路家溝至仵城合蒲縣隰州二水入
大寧縣昕州

龍子湫在州南十里西流入昕川一名瀑布泉水出山
谷昔嘗有龍見因建祠焉 宋崇寧三年賜豐登濟廟
額大觀四年勅封順民侯

衛家峪河在州西自羅真堡至普周橋入紫川
刁家峪河在州西自龍鳳埕至胡城村入紫川

蓬門河在州西北自石樓縣界羅兒溝村至縣境車家

坡五十里入紫川

明月泉在州北八里蒼崖下崖上白石如月影石壁蒼黑中有白石光瑩似月照水故名

龍泉在州北七十里妙樓山石崖前泉水注池冬夏不竭禱雨多應

溫泉在州北二百里唐置溫泉縣於此 通考溫泉有湯泉天井關置三寨

溫涼河在州東北陶化里源出靈巖寺南冬溫夏涼

康城河在州東北源出中村里水神頭流入汾河易涸
迴龍河在州東北發源興儒里水頭流入汾河

西曲河在州東北由和古里至靈石縣入汾河

古城河在州東北自穆家河至北門外入紫川

降龍溝在州東北土人傳二龍鬪神人降之

滴水泉在土同里過陶化里入汾河後涸

寶岩寺石泉 靈石寺石泉膏在陶化里冬暖夏涼

蒲縣

蒲子山在縣東北五十里跨隰蒲境 蒲伊子一名蒲
衣子以衣蒲故名一說姓伊名蒲渾渾噩噩抱道而
潛居蒲谷山中堯聞其賢躬往師之又云舜以天下
讓蒲衣遂隱此山講道臺在蒲縣 路史蒲蒲衣之
故國河東西二里之蒲津關也

按蒲州蒲津蒲城
皆以蒲子山名

龍頭嶺在縣東三里嶺上有龍頭眉鬚胥肖

東神山在縣東五里盤迤數十里山多松栢繇山麓而
上里許盤旋至巔上有岱嶽行宮故名東南三里侯

家莊有隱龍泉

荆坡在縣東南一里

南屏山在縣南一里一名蛾眉山有聖水泉東南一里有南澗泉 新志東南有東神山西南有翠屏山朝對又有峨嵋山且二水合成一巨流繞城而西

放馬嶺在縣南六十五里吉州界

翠屏山在縣西南一里山聳峰圓松栢鬱茂上有晉文公祠東突起一峰上有棲雲閣明一統志山有經閣

崖半湧泉相傳有疾者禱之飲水汗出輒愈有汗水
祠

行駕陂在縣西南二里相傳晉文公居蒲行駕於此

常安原唐志西南有常安原

七佛峽在縣西

龍母洞在縣北四十里洞啟羣山中有泉冽而甘產五色花乳石洞內有風穴風起雅似龍吼禱雨獲秋水
輒應一名龍興洞下有飲馬池

五鹿山在縣北五十里高八里盤踞十里跨隰蒲二境
通考有五鹿山蒲谷川水上有五鹿大夫廟

崧峪山在縣北七十里通汾西隰州

喬家灣山在縣東北七十里通平陽

栢谷上有荆叢生 國語二十二年公子重耳出亡及

栢谷卜適齊楚狐偃曰無卜焉夫齊楚道遠而望大
不可以困往道遠難通望大難走困往多悔困且多
悔不可以走望若以偃之慮其狄乎夫狄近晉而不

通愚陋而多怨走之易達不通可以竄惡多怨可以
共憂今其休憂於狄以觀晉國且以監諸侯之為其
無不成乃遂之狄蒲栢谷近狄故之狄水經注以弘
農縣之栢谷當之道太迂遠矣

孤石山

橫木嶺金志蒲有孤石山橫木嶺

第一河即東大河也以諸山溪澗所匯故名源出七佛
峽西北流至大寧縣入於黃河相傳晉公子重耳避

難漲平獲濟曰第一者靈之也

東大河在縣東發源分水嶺西流七十里繞城之南經隰州界過大寧入黃河

東小河發源五鹿山之北南流七十里繞城東至南屏山下合第一河而西

蒲峪川發源東山西南流二十餘里至夾村伏流至洛陽村再見又西南流二十餘里至城東會東大河

南川河發源鄉寧縣之牛王廟北流八十餘里至縣南

三里會東大小二河繇南而西折入黃河 水經河
水又南合蒲水 水經注西則兩源並發俱導一山
出西河陰山縣王莽之山寧也陰山東麓南水東北
與長松水合水出西三陽山東東北流左入蒲水蒲
水又東北與北溪會同為一川東北注河

南澗泉在縣東南一里

飲馬池在東神山下石坡有馬蹄痕

聖水泉在縣南一里南屏山下

隱龍泉在縣東南八里侯家莊

古寶泉在縣北五里龍興寺前

汗水泉在翠平山半

古寶泉在縣北五里下軍村

大寧縣

孔山在縣西北四十里高五里盤踞十里東北連永和
山西連黃河岸上有數峰中峰壁立插雲迤西一峰
巨竅通明一名風山東崖石上有聖水泉 水經注

河水南經北屈縣故城西十里有風山上有穴如輪
風氣蕭瑟習常不止當其衝飄畧無生草蓋不定衆
風之門故也風山西四十里河南孟門山 五朝志
龍泉郡樓山有孔山 元和志風山在慈州吉昌縣
北三十里明一統志山之西唐時有馬關關 唐志
金志有孔山 晉天福七年建孔山神廟

孔山洞山半一孔前後明光似車穿轂圓匝似輪恒轉
禪峰洞在孔山麓土人傳宋太祖避兵於此有蜘蛛布

網洞口以蔽之兵至不見而去後勅建禪峰寺

翠微山在城南數百武明一統志在澗河南二里高千數百仞亘一里所水繞麓山勢似旗似屏松柏蔚秀龍窩洞在縣南二里翠微山石壁上丹壁嶙峋高可百尺上有龕深廣胥丈有奇洞深杳莫測石際隆起形似龍鱗爪胥具崖下石似斗印一爪人間見之相傳唐大歷時黃龍破壁飛去一名龍眠洞又名二龍窩石子山在縣西南四十里高四里盤踞十五里山勢嵯

岷東連蒲縣山南連吉州山西連黃河岸北連永
和界一名小石山又名石子神山相傳衛石碣裔封
子爵者廟食於此後有雙石山二石對峙成趣

筆架山在縣西南山峰竦拔 宋大祖嘗建筆峰寺於
其上下臨冰玉磧

屈山在縣西南隅形勢屈曲有冰玉洞所水至此逆而
西流

冰玉洞在屈山澗洞深莫測澗凝冰光瑩似玉夏猶存

石城寨在縣西十里曹續祖臥雲洞記洞在城西十里石城寨之巔寨其山而砮者也巖石戴土土踊起形如橐駝脊中凹而兩在隆南隆之峰東南豐圓而西漸回曲下臨碧水面古寺前對栢峰於是穴山為洞適在回曲處

鎮關山在縣西七十里憑臨馬鬪關故名

捕狐山在縣北三十里永和縣界孔山之東邑治發脉傳為晉獻公捕狐處麻束溝水源此上建捕狐神祠

東山在縣東北捕狐之支高二里山有石室今名龍泉山 王維藩詩阿頂如禿翁兩竅張雙瞳窘步從竅入蟄身縮螻蟻叢豁然晨光啟引我造琳宮

昕川發源一自東北隰州曰紫川一自東蒲縣曰蒲川胥滙於隰州城東三十里件城鎮為昕川西南流繇縣羅曲鋪合永和麻東溝至縣治東經城南翠微山麓合吉州義亭川水縣境小道溝水西流經縣西十里阜城寨下石峽為梵王掃又經黑城鋪又經縣西

四十里桑俄村險石為白馬掃又西北入於黃河

按金

志有黃河白斤水今無白斤水斯字當即白斤之譌

水經河水又南至蒲川石

樓山南逕蒲城東 水經注即重耳所奔之處也又

南歷蒲子縣故城西今大魏之汾州治徐廣晉紀稱

劉淵自離石南移蒲子者也闕駟曰蒲城在西北武

谿置其水南出得黃盧水口東出歷蒲子城南東北

入谷極谿便水之源也又南合紫川水水出東北紫

川谷西南得江水江水出江谷西北入紫水紫水又

西北入蒲水蒲水又西南入於河水河水又南黑水
出定陽縣西山二源奇發同瀉一壑東南流逕其縣
北又東南流右合定水俗謂之白水也水西出其縣
南山定水谷更逕定陽縣故城南應劭曰縣在定水
之陽也定水又東注於黑水亂流東南入於河

義亭川在縣南四十五里發源吉州姑射山之金剛嶺
轉流而北經茨落鋪入縣境會蔡家川至翠微左
麓合昕水一名羊求川水經河水又南羊求水入

焉注東出羊求川西逕北屈縣故城南其水西流注於河

麻東溝發源捕狐山南流達昕河

梵王掃在縣西十里阜城寨下石峽巉巖川流澎湃即昕川西流者也水勢飛濺洶湧若帚之掃掃上懸壁石龕中有梵王像故名

白馬掃在縣西四十里桑俄村昕川徑此險石對峙水勢湍激淵深莫測相傳昔有白馬出沒石印蹄跡不

磨云一名屈產泉

黃河在縣西七十五里馬關關控帶諸山為縣西界之
扼塞南達孟門壺口接吉州界

聖水泉在孔山有石洞深廣胥三尺有泉自洞齶涓滴
而下似連珠下滙為池似玉盤恒盈不溢禱雨輒應
小道溝

永和縣

仙芝谷在縣東北五里芝河源舊名東峪川常產芝草

舊唐志武德二年永和移治於仙芝谷 山堂肆
考仙芝谷在平陽府永和縣北谷中產靈芝草

佶北山在縣東少北三十五里高八十八丈厚五十三
丈亘一里盤踞三里縣志高八里盤踞十二里是概
指左右山也有龍王巖上有寨舊有佶北神廟

北樓山在縣東南三十五里高一百十六丈通高三里
厚七十二丈亘二里盤踞五里隋置樓山縣取名以
南北樓也 五朝志樓山有北石樓山有孔山 金

志有樓山黃河仙芝水

雙山在縣東南二十五里南九十四丈遞高七里厚八十五丈亘三里盤踞七里經過一十五里兩山對峙有洞洞中有石佛

仙人洞在雙山南上有避世石城

捕狐山在縣東南七十里高八十九丈遞高五里厚八十五丈亘三里盤踞九里經過七里乃大寧縣界也
上有捕狐神廟捕狐嶺至劉家嶺五里號為險隘

臥牛山在縣南四十里高三十九丈厚二十一丈亘一里盤踞三里形似臥牛

南樓山在縣南六十里高百三十四丈遮高五里厚八十六丈亘二里盤踞五里對北樓山南北兩山相對其形如樓 明一統志縣南四十八里

龍巖在縣南七十里上有石洞相傳宋太祖避亂於此山一名宋龍巖一名避世窰

烏龍山在縣西南四十五里高四十二丈遮高五里厚

二十九丈亘一里盤踞三里相傳北齊時有黑龍見於此因立廟焉土人名閣山上有閣王廟閣王墳碑記泐蝕一說山多栢栢為烏龍故名

烈鳳山在縣西十五里高三十八丈厚二十丈亘一里盤踞二里形似鳳翔

大寨嶺在縣西三十里乃永和開道也

馬脊山在縣西四十里高五十九丈厚四十八丈亘一里盤踞三里形似馬一名馬頭山

龍洞泉在縣西北五里流入榆林河

石窰溝在縣西北二十里有神洞徑道崎嶇人跡少至
窰內水滴如珠下有清泉禱雨輒應

香巖在縣西北七十里巔有清泉流入古剎

泰山頂在縣北二里危峰突兀芝水環流

崧峪在縣北七十里峪口設鎮

羅漢洞在縣北七十里巖頂有清泉流入香巖寺內

黃河在縣西南七十里北自石樓界六十五里至縣境

永和關南流六十里入大寧境 水經河水又南為采桑津 水經注春秋僖公八年晉里克敗狄於采桑是也

仙芝河在縣東北二十里源出仙芝谷經東峪溝曲流二十里會城西五花泉又至縣西門外又西南流九十里會諸水為千枝溝入黃河 縣諸山胥有水繇石崖流合小川入千枝溝

靈液池在縣治東南仙芝坊 古碑北齊河清二年有

龍自泉中出遂立祠池上池側有井亦名靈液

甘露河在縣西南東流至縣西南二十里會仙芝河


五花泉在縣城西隅亦傳北齊時龍出泉中其水入仙

芝河

采桑津其縣西劉昭註北屈有采桑津左傳僖公八年晉敗狄於采桑杜預曰縣西南有采桑津

榆林川在縣西北三十里經後河村會龍洞泉至縣治西入仙芝河南流

索陀山在縣東北三十五里西流復折而南至縣西入
仙芝河
通考有索陀谷永和關



山西通志卷二十八